

O Estuto rei Remiro II o Monche e o naximientu d'a Corona d'Aragón

A creyazión d'o reino d'Aragón, que se produze cuan Remiro, fillo d'o rei Sancho o Mayor de Pamplona, azede á o gubierno de l'antigo condato en o año 1035, senificó a reaparixión d'Aragón como entidá política dimpués d'un sieglo d'unión con o reino de Pamplona. Pero en ista ocasión, a suya irruzió se fazió con tal empente que á ro largo d'un sieglo s'estendillarán as suyas güegas dica o corazón d'as montañas d'a cordillera iberica. En un sieglo o territorio aragonés se triplicó, aumentando a suya enfluyenzia política e melitar sobre os Estados bizins d'o sur de Franzia, Nabarra, Castiella e Lión.

En ixa puenda s'asola a lechitimidá d's nueva monarquía aragonesa por meyo d'a infeudazión d'o Reino d'Aragón á Roma, produzita dimpués d'o biache que fazió Sancho Ramírez á ra capital d'a cristiandá en o año 1068. Dende ixe momento no solo que s'aconsiguen enfortir os tetulos de sobiranía d'os monarcas aragoneses, sino que o país se ubre á o resto d'Europa con a sustituzión d'a liturchia mozarabe por a romana en ilesias e monesterios, o enfortimiento d'as relaziions comerziales á trabiés d'o puerto de Somport, o rebiscolamiento de Chaca como capital d'o reino, siede episcopal e zentro mercantil (repoblando-se con gran cantidá d'inmigrans ultraperinencos), a cudizió de moneda chaquesa e l'empente melitar en campañas reyalizatas con a colaborazió de lumerosos señors feudals d'o Norte. Estió en ixe contesto como se produzió la que beluns consideran a primer cruzata d'a Historia en 1063 (la de Balbastro), á cualo clamamiento acudieron tropas plegatas dende Gascuña, Franzia, Normandía e Urchel.

O Reino d'Aragón, que estableió una güega melitar con o mundo islamico fortificata con una línia de castiellos en o limite entre a montaña e a tierra plana, empezipió á lanzar ataques, cada begata más premazers enta o sur e á menazar as prenzipals ziudaz d'a Marca Superior d'Al-Andalus dica ir emparando-sen-ne una á una. Asinas que fueron cayendo progresibamén en mans aragonesas baxo ro liderazgo de Remiro I, Sancho Ramírez, Pietro I e Alifonso I Graus, Balbastro, Alquezra, Uesca, Zaragoza, Tudela, Tarazona, Calatayú, Daroca...

Estió Alifonso I, conoxito por a embotada de "O Barallador", qui menó l'agrandamiento melitar, político, economico e territorial d'Aragón ta ra suya fuga. E, manimenos, o mesmo esprito barallador, embuyito d'un ideyalismo mesianico sobre a misión sagrata d'o suyo reino en a recuperazió d'os Santos

Lugars, estió a causa d'una grabisma crisis politica e melitar que, á ra suya muerte en o año 1134, cuasi malfurrió zien añadas de progresos aragoneses.

Efeutibamén, o imbenzible e ideyalista rei guerrero murió chusto dimpués de sofrir a suya unica redota melitar d'importanzia, que acayezió en chulio de 1134 debán d'os muros d'a ziudad de Fraga. A suya muerte, dos meses dimpués, se produzió sin bagar-li de reorganizar o exerzito aragonés debán d'un prebisible cuentrataque musulmán. Ta empiorar encara más as cosas, portiato por a suya delera relichiosa e cruzata, Alifonso eba legato en o suyo testamento tot ro suyo reino, os suyos abitadors e os suyos biens á Dios e as ordens melitars, espezialmén á la de l'Espital d'os pobres de Cherusalén.

Asinas lo atrazó, literalmén, Alifonso I:

“En o nombre de Cristo e d'a suya dibina clemenzia. Yo Alifonso, rei por a grazia de Dios, foi ista carta de donazió e confirmazió á o Señor Dios e á l'Espital d'os pobres de Cherusalén. Me fa goyo con animo liberato e boluntá espontánia e por causa de l'amor á Dios e ta ra remisió d'os míos pecatos e d'os d'os míos familiars.”

“Atorgo e conzedo á ro dito Espital quanto yo poseyo, á os ombres como á ras mullers de tota ra mía tierra, isto ye, castiellos, billas, toz os ombres, casas, posesions, tierras, biñers, totas aqueras cosas que güei tiene l'Espital u os suyos ombres que sirben á Dios; e tot quanto se pueda adibir, aumentar e ixamplar en tota ra mía tierra, seiga en onor e ta erenzio propio de Dios e de l'Espital d'os pobres de Cherusalén.”

“Igualmén autorizo e conzedo que os caballers que me dioron basallos ta os castiellos e billas en tota ra mía tierra con toz os suyos zensos, entreguen os zensos á l'Espital e queden ta iste ta cutio; e que garra ombre u señor pueda crompar, bender u cambear á aquers ombres por otros sin boluntá de l'Espital de Cherusalén.”

“E qualque ombre u muller que quiera crebantar iste testamento e mandamiento seiga estranio á o Cuerpo de Cristo e con Datán e Abirón e con o traidor Chudas seiga condenato á l'infierno, amén. E á yo u á ra mía rechia presona bose con mil morabetins u con o suyo cuerpo.”

“Feita ista carta en o mes de chulio de 1134, en o sitio de Fraga.”

O enarcamiento que cheneró iste testamento en meyo d'as repentinas menazas que s'acapizaban sobre Aragón fue asoluto e as suyas consecuencias

podeban aber ausidito as conquistas de tot un sieglo.

En tota ra zona güegatiza ra poblazón cristiana rezién aposentata se bió presa d'a zera. Entre 1135 e 1136 os musulmans recuperoron Mequinenza, Ontiñena, Sariñena, Chalamera, Pomar de Zinca, parti d'o Baxo Aragón e Monzón. Os aragoneses abandonoron Pina, Alfaxarín e Belilla, e dixoron sin esfensa totas as tierras á o sur de Daroca dica As Zellas e Singra, en a raya d'as tierras conquistatas por Alifonso I.

Sin dembargo, esistiba atra menaza: a d'o rei de Lión e nuebo rei de Castiella, Alifonso VII, deseyoso de recuperar a enfluyenzia e os territorios perditos por o suyo reino á mans de qui estió ro suyo padraastro (Alifonso o Barallador) e, de paso, aturar a expansión d'aragoneses, nabarros e catalans enta o Sur, en fendo-se amo de tota ra compleganza de l'Ebro dica o mar, sozmetendo á basallache feudal á istos Estados e proclamando-se *Imperator Hispaniae*.

Asinas pues, aprobeitando a terror d'os repobladors cristianos e con a desincusa de protecher-los, as tropas castellanas imbadioron a Bal de l'Ebro e ocuporon Zaragoza. Estió tamién en iste contesto de temor por a situación melitar e o subito debilitamiento d'o liderazgo aragonés como s'azeutó a demanda sezesionista d'a nobleza nabarra, deseyosa de restaurar a monarquía pamplonesa en a fegura d'un deszendién d'a reyalza clamato Garzía Ramírez, qui dende o primer inte se bió politicamén e militar respaldato por o rei de Lión e Castiella en nombrando á Garzía, de traza más nominal que efeitiba, señor de Zaragoza.

Iste yera o panorama que li calió confrontar o unico chirmán bibo d'Alifonso o Barallador, Remiro, qui seguntes o Dreito aragonés, á falta d'un ereu, yera o suzesor reconoxito ta ra monarquía aragonesa. O feito de que Remiro fuese un monche no empachó garra que asumise con zeleridá, intelichenzia, eficacia e una gran claribidenzia ixo liderazgo que tan dramaticamén se nezesitaba ta confrontar os nuebos periglos. A suya estratechia estió consecuen tanto con a magnitú d'as menazas como con la d'as menguatas fuerzas d'o país. Asumió como imprible a sezesión de Nabarra, pero pautó con o nuebo rei güegas e cuentrapesos que mantenesese á raya á o rei lionés.

En lo que á iste respeuta, precuró ganar-se estutamén a suya confitanza azeutando sin d'oxezions a suya posesión d'as tierra de Zaragoza. D'iste modo, enzurizando l'angluzia d'Alifonso VII, aconsiguiba que s'establise un buchón

esfensibo entre Aragón e A-Andalus que permitise a reorganización d'os aragoneses sin o risque de perder as conquistas feitas por Alifonso I. Antimás, sapeba por a suya esperenzia como monche e como politico (no olvidemos que pertenexeba á ra familia reyal) que o Papa luego desichirba o cumplimiento d'o testamento d'o Barallador (cualo unico beneficiario yera a Ilesia). Ta ra suya execuzión yera nezesario que Zaragoza tornase á mans de Remiro II, qui sapeba que una condena papal empacharba á o rei de Lión e Castiella estar reconoxito por a Ilesia como Emperador, debilitando con ixo a suya enfluyenzia politica sobre os otros Estados e sobre os aristocratas d'os suyos reinos.

A prebisión de Remiro II se cumplió: o Papa Inozenzio II desicchió en una bula á Alifonso VII ro cumplimiento d'o testamento d'o Barallador e, dimpués d'estar íste coronato Emperador en 1135, entregó en agosto de 1136 o reino de Zaragoza á Remiro. D'aquer episodio ha plegato una remeranza dica os nuestros días: o emblema d'o lión rampante, simbolo d'a realeza lionesa, que a ziidá de Zaragoza acarrazó como suyo en reconoximiento (e, dimpués, en remeranza) d'a protezió que Alifonso VII dispensó en aquers difízils tiempos á ra ziidá.

En o plano interno, a suya autoridá e l'abalurazión d'os suyos autos no sempre estió debitamén replecata en primerías por os prenzipals señors d'a guerra aragoneses, acostumbratos á la dureza e determinazión melitar d'Alifonso I. Remeremos que a primera dezisión que bi abió que abordar estió l'azeutazión sin oposizió d'a sezesión de Nabarra, promobita por a nobleza d'ixe país e guarenziata por o menazador rei de Lión e Castiella. Dimpués d'ista rebesada, a ocupazión de Zaragoza e as suyas tierras por parti d'o lionés e a perduga á mans d'os musulmans de bels d'os territorios conquistatos por Aragón en a Tierra Plana escabonoron fuertemén a moral e a confitanza d'os aragoneses en a capacidá d'o suyo rei ta salbar á o país d'o desastre.

E con o tiempo as cosas no amilloraban: Castiella s'emparó, sin que Ramiro podese pribar-lo, tota ra faxa d'a meseta e o besán ueste d'a cordillera iberica, dende Agreda dica Molina d'Aragón. Yeran tierras que o Barallador eba conquistatas á os musulmans, e que encluyiban as ziidaz de Soria, Almazán, Medinazeli e Sigüenza. Alifonso VII cconsideraba que tota ra meseta se trobaba drento d'os limites cheograficos naturais enta los que s'enfilaba ra suya expansión, no estando azeitable ta el a prezencia aragonesa á l'Ueste d'a cordillera iberica. Á penar d'ixo, o peligarzero Remiro plegó á diferens alcuerdos de colaborazión con

Alifonso VII, dica o punto de plegar á planeyar con íste a imbasión conchunta e posterior reparto de Nabarra, enfilando con ixo l'angluzia d'o suyo poderoso ribal enta atro d'os suyos enemigos.

Y en iste chuego d'equilibrios, tamién tenió que pautar diferens treguas con os musulmans que premitisen mantener a estabilidá en as güegas á l'aspera de tiempos millors.

En ista dezezionadera aspera, a tensión e acritú enta Remiro naxita entre os angluziosos nobles aragoneses por a delimitación de güegas e a conserbazión d'un territorio en lo que antis más lis eban estatas datas u prometitas prebendas, rendas e señoríos estió enorme. Ixo e a suya condizión clerical animó á bels d'ellos á la desobediencia cuan no á la rebelión ubierta custionando asinas l'autoridá d'o rei e metendo en periglo a suya corona.

Remiro autuó á o prenzipio con diplomazia e prudenzia con ellos, prebando d'amansar a suya empenta. Manimenos, o rei moncho sabió manifestar a suya determinación d'imponer-se mesmo con o uso d'a biolenzia cuan os nobles plegoron á meter en periglo a seguridá d'o reino fren á ras potenzias ribals. Tal estió ro causo d'a biolación d'as treguas que Remiro firmó con o reino de Leida ta mantener pazificamén a estabilidá d'a suya güega en os Monegros dica que plegasen ta Aragón tiempos millors. Beluns d'os señors malcontentos reyalizoron azions guerreras sin o consentimiento d'o rei, biolando a paz achustata. Asinas, á escomienzos de 1135 una carabana musulmana que s'enfilaba de Fraga ta Uesca estió atacata por guerrers aragoneses. Debán d'iste feito, Remiro no dudó en escapezar os siete nobles que eban crebantato a parola rey, episodio que dio puesto á ra lienda d'a "Campana de Uesca" e que refirmó ro suyo fuerte caráuter e autoridá fren á os que custionaban a suya capazidá de mando.

O cabo rezentato en a Coronica de San Chuan d'a Peña, en a suya bersión en aragonés, diz asinas:

Et aquesti don Remiro fue muyt buen rey et muyt francho a los fidalgos, de manera que muytos de los lugares del regno dio a nobles et cavalleros; et por esto no lo precioron res, et fazían guerras entre si mismos en el regno et matavan et robavan las gentes del regno, et por el rey que non querían cessar aquesto; et fue puesto en gran perplexidat cómo daría remedio a tanta

perdición del su regno, et non osava aquesto revelar a ninguno. *Et por dar remedio al su regno embió un mensagero al su monasterio de Sant Ponz de Tomeras con letras al su maestro, clamado Forçado, que era seydo porque yes costumbre et regla de monges negros que a todo novicio que era en la orden dan un monge de los ancianos por maestro, et según la persona de aquesti don Remiro que merecía dieronli el maestro muyt bueno et grant et savio, en las quales letras recontava el estamieto del su regno et mala vida que passava con los mayores del su regno, rogándole que le consellasse lo que faría; el maestro con grant plazer que havía, recibidas las letras, pensó que sería irregular si le consellava que fizies justicia, clamó el mensagero al huerto en el qual havía muytas coles et sacó un gavinet [sic] que tenía et, teniendo la letra en la mano et leyendo, talló todas las colles mayores que yeran en el huerto et fincoron las solas chicas, et dixole al mesagero: "Vete al mi sennor el rey et dile lo que has visto, que no te do otra respuesta". El qual mesagero con desplazer que respuesta non le havía dada, vino al rey et recontole que respuesta ninguna non le havía querido fazer, de la qual cosa el rey fue muit despagado, pero quando contó la manera que havía visto, pensó en si mesmo quel huerto podía seer el su regno, las colles yeran las gentes del su regno, et dixo: "Por fer buenas colles, carne y a menester". Et luego de continent envió letras por el regno a nobles, cavalleros et lugares que fuessen a cortes a Huesca, metiendo fama que una campana quería fazer en Huesca que de todo su regno se oyesse, que maestros havía en Francia que la farían; et aquesto oyeron los nobles et cavalleros dixeron: "Vayamos a veer aquella locura que nuestro rey quiere fazer", como aquellos que lo preciavan poco. Et quando fueron en Huesca, fizo el rey parellar ciertos et secretos hombres en su cambra armados que fiziessen lo qué les mandaría. Et quando venían los ricos hombres, mandavalos clamar uno a uno a consello et como entravan, assí los mandava descabeçar en su cambra; pero clamava aquellos que le yeran culpables, de guisa que XIII ricos hombres et otros cavalleros escabeçó ante que comies, et avría todos los otros cavalleros assí mesmo descabezados sinon por qual manera que fue que lo sintieron que yeran de fuera et fuyeron; de los quales muertos ende havía los V que yeran del linage de Luna, Lop Ferrench, Rui Ximenez, Pero Martinez,*

Ferrando et Gomez de Luna, Ferriz de Liçana, Pero Vergua, Gil d'Atrosillo, Pero Cornel, García de Bidaure, García de Penya et Remón de Fozes, Pero de Luesia, Miguel Azlor et Sancho Fontova cavalleros. Et aquellos muertos, no podieron los otros haver que yeran foydos, sosegó su regno en paz.

Á penar de tot lo dito dica agora, Remiro teneba una sinzera bocazón relichiosa á la que nunca no arrenunzió de raso á penar d'as obligazions d'Estado á ras que tenió que consagrar-se. Ista bocazón prebablemén fazelitó l'aluerdo con a Ilesia e as ordens melitars ta que azeutasen fuertes compensazions economicas e territorials á cambeo d'arrenunziar á lo inaplicable testamento d'Alifonso. Pero á penar d'o suyo cada begata más esclatero desito en o mantenimiento d'as conquistas d'Aragón, as suyas aspirazions presonals d'una prosima tornata á ra vida relichiosa se confrontaban conn a nezesidá d'asegurar a suzesión d'a suya dinastía e de continar mantenendo á raya á os ribals d'Aragón. A suya extraordinaria bisión d'Estado li feba pro coszién d'a nezesidá d'otener nuevos aliados con los que poder fer fren á ra grandaria e poderío que a Corona de Lión e Castiella representaba en a peninsula iberica. Finalmén, a respuesta á ixé dople desafío la trobó en o Este, en a fegura d'o conde más poderoso d'os que gobernaban en os territorios d'a Marca Hispanica que siguiba orbitando —unque cada begata más luñes— en a esfera de poder d'os reis franceses.

Efeutibamén, os condatos d'o que por ixé tiempo ya emepziaba á clamar-se Cataluña yeran escomenziando á remontar d'una fosca puenda de biolenzia e caos cheneralizato escomenzata á meyatos d'o siglo anterior. Primeramén, o crexién desintrés reconquistados e as luitas intestinas d'os carolinchios e, dimpués, cuasi zien añadas de guerras feudals, eban determinato un radito abanze territorial d'os condatos catalans dende o siglo IX. Ramón Berenguer IV, conde de Barzelona, nomás yera un choben con solo que tres añadas d'esperenzia de gobierno cuan murió o Barallador. Pero en 1136 Remiro II clabó en el os suyos güellos ta apachar a suya espazenzia por tornar á ra vida clerical con a nezesidá d'alportar un ereu que continase con a dinastía d'Aragón. A suya ideya yera la de casar-se con una muller de fertilidá acreditata (que estió a noble bidua Inés de Poitiers, á la que se unió en Chaca en nobiembre de 1035) e tener un ereu á qui trasmitir a suya corona.

A esperenzia d'o matrimonio no resultó ta Remiro tan agradable como ta cambear os suyos plans de mantornar ta ra vida clerical antis con antis. Por ixo,

cuan Inés libró una ninona –Petronila- o 29 de chunio de 1136, arrenunzió á seguir teniendo más fillos, espartindo-se d'a suya muller en as zaguerías d'ixa mesma añada. Asinas pues, a suya dezisión estió la de trasmitir a suya dinastía á trabiés d'a suya filla, mediante un “casamiento en casa” con un prenzipe d'atro Estato en lo que, de paso, refirmar-se en una unión duradera fren á lo menazador poderío d'os suyos bizins. O prenzipe eslexito por Remiro eba d'estar Ramón Berenguer IV, con qui firmó lo 11 d'agosto de 1137 un alcuerdo d'esponsals ta ra suya fila, refusando l'ofrimiento d'o rei de Lión de proposar-li o suyo fillo y ereu, Sancho, ta estar esposato con Petronila. De seguras que Remiro no'n yera coszién, pero en ixos momentos eba á lebar á cabo una d'as más machistrals chugatas politicas d'a Edá Meyá, la cual eba de dar orichen con o tiempo á un ligallo d'Estatos que ferba d'a dinastía d'Aragón una d'as más poderosas d'Europa en os siguiens tres siglos e meyo.

Tot ixo estió a fuga d'a gran obra d'o estuto rei d'Aragón, Remiro II o Monche qui, engañando á o rei de Lión, traizionando á o de Nabarra, estrumentalizando á o Papa, fendo-se á pachas con os musulmans, amedrentindo á ra nobleza aragonesa e manipulando á o conde de Barzelona, aconsiguió combertir o deseyo de rebancha d'os lioneses e castellans e o esbarío d'as desposizions d'o suyo chirmán en a guarenzia que Aragón amenistaba ta salbar as suyas menazatas conquistas e combertir o suyo país en una gran potenzia europeya.

Miguel Martínez Tomey
Fundación Gaspar Torrente